

Un Pùzel Kompliká

Suisidio ta un pùzel kompliká. Maske e ta un krímen, tòg esun ku ta purba mata su kurpa i ta frakasá no ta kastigá pa lei. Maske Palabra di Dios ta menshoná por lo ménos seis suisidio, tòg ningun teksto ta kontené un kondenashon DIREKT di e akto violento aki. Apesar ku esei por ta e kaso, e no ta nifiká ku destrukshon di bo propio bida ta un akto étiko. Nota algun opservashon.

Pa di promé, "No mata" (Exodo 20:13) ta un di e Dies Mandamentunan. Si Dios ta prohibí asesinato, anto tantu homisidio komo suisidio (asesinato propio) ta kai bou di e mésun kondenashon. Suisidio ta piká, un violashon dirèkt i intenshonal di Dios Su mandamentu.

Hende ta úniko debí ku e so a ser kreá den imagen di Dios. P'esei Dios ta demandá kastigu severo pa asesinato: "Ken ku drama sanger di hende, hende lo drama su sanger, pasobra segun imagen di Dios El a traha hende" (Gènesis 9:6). Hende ta prohibí di destruí un ser humano, PASOBRA kada persona ta kreá den imagen di Dios. Esun ku ta kometé suisidio ta kulpabel di hasi nèt esei.

Pa di tres, bida humano ta un regalo. Nos Kreador a dun'é, i E SO tin e derechu pa kit'é for di nos. Asta ora nos no ta komprende e problemanan di bida, nos tin e deber pa ku nos Kreador pa biba te ora E ta haña ta bon pa terminá nos bida. Esun ku ta kita su mes bida ta hasi e deklarashon mentiroso arogante: "AMI ta kreador i kontroladó di mi propio bida!"

Un di kuater opservashon: Dios ta eksigí pa "stima bo próhimo méskos ku bo mes" (Mateo 19:19). Un implikashon di e teskto aki ta ku mi ta stima mi mes. Si stimashon pa mi próhimo ta prohibí mi di mat'é, anto stimashon pa mi mes tambe ta prohibí mi di destruí mi propio kurpa.

Pa di sinku, suisidio ta basá riba rasonamentu kontradiktorio. Algun hende ta sigur ku nan ta liber pa hasi loke nan ke, inkluiendo liber pa mata nan mes. Ma ta iróniko ku usando nan libertat, likidando nan mes, nan ta destruí nan libertat. Pues, suisidio ta un akto di libertat ku ta destruí tur futuro akto di libertat. E rasonamentu ei ta kontradiktorio. Otronan ta konvensé ku nan propio suisidio ta un akto bon pensá. Ma un akto ku ta destruí e abilidadat pa pensa ta un akto "bon pensá"? Rasonamentu asina ta apsurdo.

Nota un otro rasonamentu ilógiko. Esun ku ta kontemplá suisidio ta buska su propio bienestar (e ta deseá un bida sin doló sosial, emoshonal, físiko, èts. òf no ta dispuesto pa sigui biba ku e doló ei). Ma pa alkansá e "propio bienestar" ei, e ta violá e "propio bienestar" mas básiko, esta bida mes.

Un otro opservashon ta ku morto no ta fin di bida. Bes tras bes Palabra di Dios ta laga sa ku "kada un di nos lo duna kuenta di su mes na Dios" (Romanonan 14:12). Debí ku tin bida despues di morto i debí ku nos tin ku duna kuenta na Dios pa loke nos ta hasi durante nos bida, ta prudente pa riska drenta Dios Su presensia abrupto sin invitashon na un forma moralmente inaseptabel? Pa e famianan ku ta keda atras, suisidio ta un eksperensia sumamente doloroso. Nan no solamente ta sufri e pena emoshonal di pèrdè un ser kerí, ma nan tambe ta eksperensia bèrgwensa i umiyashon pasobra e morto tabata un suisidio. Ku frekuensia nan ta lucha ku sintimentu di kulpabilidad. "Kisas mi por a hasi algu pa okashoná e suisidio òf mi por a prevenié." Ademas, nan ta puntra nan mes di e destino di un pèrsona ku a kometé un akto violento kontra s propio kurpa.

Suisidio NUNKA ta e kontesta korekto. Esun ku ta kometé suisidio ta nenga buska un bon solushon. E ta skohe un manera ku ta kontra étika pa trata ku e situashon. Suisidio ta un manera kobarde pa trata ku problema: kore p'é problema, purba skapa di dje. Ademas, suisidio ta egoismo. E'n ta tene kuenta ku otronan, ki un trouma e lo obligá nan pasa aden.

Tristu ta ku SUISIDIO TA UN SOLUSHON PERMANENTE PA UN PROBLEMA TEMPORAL. E persona ta pèrdè speransa na lugá di buska e solushon serka Esun ku por resolvé tur problema den bida. Hesu-Kristu a bisa klaramente, "Bini serka Mi tur ku ta kansá i kargá i lo Mi duna boso deskanso" (Mateo 11:28). E si por solushoná tur pùzel kompliká den bida.